

# NÜXĨRAÜXÜ GA POPERA GA TECHARÓNICAWA YEXMAGÜXÜ GA YAXŌGÜXÜTANÜWA NAMUXÜ GA PAURU

*Pauru rü nüxü narümoxē ga yema yaxōgüxü ga Techarónicawa yexmagüxü*

<sup>1</sup> Pa Toeneēgü i Techarónicawa Ngēxmagüxü i Tanatü ya Tupana rü Tórü Cori ya Ngechuchu ya Cristuarü Duüxügü Ixīgüxüx, choma i Pauru rü namaã i taeneē i Chiribánu rü Timutéu nixĩ i pexcèx tanaxümatüxü i ñaã popera. Rü tanaxwèxe i Tanatü ya Tupana rü tórü Cori ya Ngechuchu ya Cristu pexü narüngüxēē rü pexü nataãēxēē.

*Meãma nayaxōgü ga yema Techarónicawa yexmagüxü rü yemaãcü wüxi ga cuèxruü ga mexü nixīgü*

<sup>2</sup> Rü torü yumüxēwa rü guxüguma pexna tacuèxãchigü, rü pexcèx Tupanana moxē taxã. <sup>3</sup> Rü guxüguma i ngēxguma Tanatü ya Tupanamaã tidexagügu, rü taguma nüxü itayarüngümaē na ñuxãcü meã peyaxōgüãcüma penaxüxü i Tupanaärü puracü, rü ñuxãcü nüxü pengechaügüãcüma togüxü perüngüxēēxü. Rü taguma nüxü itayarüngümaē na ñuxãcü aixcüma meã ípenangüxēēxü ya tórü Cori ya Ngechuchu ya Cristu rü ngēmacèx yaxna namaã pexĩnüē i ngēma ngüxü i ñuxma pingexü. <sup>4</sup> Pa Chaueneēgüx, Tupana pexü nangechaü, rü nüxü tacuèx rü nümatama nixĩ ga pexü nadexü. <sup>5</sup> Rü yexguma

pemaã nüxũ tixuxgu ga Tupanaãrũ ore i tüxũ maxẽxẽẽxũ, rü tama toechama tidexagũmare, yerũ Tupanaãẽ i Üünexũ toxũ narüngũxẽẽ na norũ poramaã pemaã nüxũ tixuxũ. Rü meã nüxũ tacuáãcũma pemaã nüxũ tixu ga yema ore yerũ toõẽwatama nüxũ tacuèx na aixcũma yĩĩxũ. Rü pematama nüxũ pecuèx ga ñuxãcũ meã pepèxewa na tamaxèxũ ga yexguma na yemaãcũ pexũ tarüngũxẽẽgũxücèx. <sup>6</sup> Rü pema rü meãma penaxügũ ga yema pexũ tangúexẽẽxũ rü yema tüxũ nangúexẽẽxũ ga tórũ Cori ya Ngechuchu. Rü Tupanaãẽ i Üünexũ pexũ taãẽxẽẽãcũma penayauxgũ ga yema ore ga woo yemacèx poraãcũ ngúxũ na pingegũxũ. <sup>7</sup> Rü yemaãcũ ga pema rü wüxi ga cuèxruũ ga mexũ pixĩgũ naxcèx ga guxũma ga yema yaxõgũxũ ga Machedóniããnewa rü Acayaanewa yexmagũxũ. <sup>8</sup> Rü yema na peyaxõgũxũgagu rü tórũ Cori ya Ngechuchuarũ ore rü guxũwama ninguchigũ. Rü ngẽmacèx i ñuxma rü Machedóniããnewa rü Acayaanewa rü guxũwama nüxũ nacuèxgũ na ñuxãcũ meã Tupanaãxũ peyaxõgũxũ. Rü ngẽmacèx marũ taxucèxma tüxcũũ i toma rü namaã nüxũ tixu i ngẽma ore i mexũ i pechiga. <sup>9</sup> Erũ nümagütama i ngẽma duũxũgũ rü marũ nüxũ nixugügũ ga ñuxãcũ ga pema rü meã toxũ na peyauxgũxũ ga yexguma petanũwa taxĩxgu. Rü nüxũ nixugügũ ta ga ñuxãcũ nüxũ na perũxoexũ ga perũ tupananetachicünèxãgũ na Tupanaxũchi ya maxũcũ rü ixaixcũmacũwe perũĩxũcèx rü nüxũ pepuracũexũcèx. <sup>10</sup> Rü nüxũ nixugügũ ta na ñuxãcũ aixcũma ípenanguxẽẽxũ na wenaxãrũ

daxūwa ne naxūxū ya Ngechuchu ya Tupana Nane ga yuwa ínadxēēācū. Rū yima Ngechuchu nixī ya tūxū ínguxūxēēcū nūxna i ngēma poxcu i āūcūmaxū tá ínguxū.

## 2

### *Pauruarū puracū ga Techarónicawa*

<sup>1</sup> Pa Chaueneēgūx, rū pematama nūxū pecuèx rū tama natūcèxmamare nixī na pexūtawa taxīxū. <sup>2</sup> Rū pema nūxū pecuèx rū naxūpa ga pexūtawa na tangugūxū rū chixri tomaã nachopetū ga Pirípucūāxgū rū tomaã naguxchigagū. Natūrū Tupana toxū narūngūxēē na pemaã nūxū tixuxūcèx ga norū ore i tūxū maxēxēēxū. Rū yemacèx tama tamuūēācūma pemaã nūxū tixu ga yema ore woo ga torū uwanūgū rū poraācū toxū na naguxchaxēēgūāxū. <sup>3</sup> Rū yexguma pemaã nūxū tixuxgu ga yema ore, rū tama ítatūeācūma pemaã nūxū tixu. Rū tama chixexū pemaã taxūgūchaūācūma rū tama pexū tawomūxēēgūchaūācūma pemaã nūxū tixu ga yema ore. <sup>4</sup> Yerū Tupana nixī ga toxū unetacū rū toxū mucū na pemaã nūxū tixuxūcèx ga norū ore i mexū i tūxū maxēxēēxū. Rū yemacèx Tupana naxwèxexūācūma pemaã nūxū tixu ga yema ore. Rū tama duūxūgūxūmare na tataāēxēēgūxūcèx pemaã nūxū tixu, natūrū nūxū tixu na Tupanaxū tataāēxēēgūxūcèx. Rū nūma ya Tupana nixī i tūxū nacuáxū rū tūxū nadauxū rū nangugūāxū i ngēma nagu rūxīnūēxū. <sup>5</sup> Rū pema nūxū pecuèx rū taguma pepēxewa pexū ticuèxūūgū na toga pexīnūēxūcèx, rū taguma pexū

tawomüxēēgü na ngĩxũ tayauxgüxüçèx ga perü dīeru. Rū Tupana nixĩ ya toxũ daucü na taguma yemaãcü na tanaxüxũ. <sup>6</sup> Rū taguma naxcèx tadaugü na duũxüğü toxũ icuèxüüğüxüçèx, rü woo i pema rü bai i togü i duũxüğü. <sup>7</sup> Rū woo Cristutama toxũ namu na yaxõgüxũãrũ ãëxgacügü na tixĩgüxũ natürü tama ñoma wüxi ga ãëxgacürüũ pepewa tixĩgü. Natürü meãmare pemaã itacuèx, ñoma wüxi i mamá i ngĩxãcügüna meã dèuxcürüũ pemaã tixĩgü. <sup>8</sup> Rū poraãcü pexũ tangechaũ, rü yemacèx pemaã nüxũ tixu ga Tupanaãrũ ore. Rū tama yemaxicatama pexna taxãxchaũ ga yexguma. Natürü marü itamemare ta ga pexcèx na tayuexũ, yerü poraãcü pexũ tangechaũgü. <sup>9</sup> Pa Chaueneëgüx, pema nüxũ pecuèx ga ñuxãcü poraãcü na tapuracüexũ na torü õnacèx tataxegüxüçèx. Rū ngunecü rü woo chütacü tapuracüe na taxúeaxũma wüxi ga guxchaxũ tixĩgüxüçèx ga yexguma petanüwa tayexmagügu rü pemaã nüxũ tixuxgu ga Tupanaãrũ ore. <sup>10</sup> Pa Duũxüğü i Tupanaãxũ Yaxõgüxũ, pema nixĩ ga toxũ pedaugüxũ rü Tupana rü ta toxũ nadau ga ñuxãcü meã na tamaxèxũ ga petanüwa, rü ñuxãcü taxuũma ga chixexũ na taxüxũ ga yexguma. <sup>11</sup> Rū pema nüxũ pecuèx ta ga ñuxãcü pexũ na tanangüchaũxèèxũ. Rū yexguma pengechaũgügu, rü pexũ tataãëxèègü ñoma wüxi i papá i naxãcügüxũ taãëxèègüxũrũ. <sup>12</sup> Rū ñuxma na Tupanaãrũ pixĩgüxũ, rü pexũ taxucuxègü na meã naxcèx pemaxèxũ. Rū nüma nixĩ i pexcèx nangemaxũ na ngextá ãëxgacü íyĩxũwa pengugüxüçèx na ngema mexũwa

pengēxmagüxcèx. <sup>13</sup> Rū ngēmacèx guxüguma pexcèx Tupanana moxē taxā, yerü yexguma noxri nüxŭ pexĩnüēgu ga yema norü ore ga pemaã nüxŭ tixuxŭ, rü meã penayauxgü, yerü nüxŭ pecuèxgü rü aixcüma Tupanaãrŭ ore nixĩ rü tama duŭxügŭarŭ oremare nixĩ. Rŭ yema ore nixĩ ga naxüchicüxŭ ga perü maxŭ ga yexguma peyaxögŭgu. <sup>14</sup> Pa Chaueneēgŭx, nüxŭ tacuèx na ñuxäcü ngúxŭ pingegüxŭ yerü petanüxügŭtama pexchi naxaie rü chixri pemaã nachopetü. Natürŭ yemaãcütaama nüxŭ nangupetü ga Tupanaãrŭ duŭxügŭ ga Ngechuchu ya Cristuaxŭ yaxögüxŭ ga Yudeaanewa yexmagüxŭ. Yerü natanüxügŭtama ga Yudíugŭ rü chixri namaã nachopetü. <sup>15</sup> Rŭ yema Yudíugŭ nixĩ ga tórŭ Cori ga Ngechuchuxŭ imèxgüxŭ, yexgumarüŭ ga norü oxigŭ rü nuxcümaŭgüxŭ ga Tupanaãrŭ orearŭ uruügüxŭ na nadèixŭrŭŭ. Rŭ yema Yudíugŭ nixĩ ga towe ingèxŭtanüxŭ. Rŭ Tupanamaã rü guxŭ i duŭxügŭmaã narüxuanügŭ. <sup>16</sup> Rŭ ngèxguma ngēma duŭxügŭ i tama Yudíugŭ ixīgüxŭmaã nüxŭ tixuxchaŭgu i Tupanaãrŭ ore na nümagŭ rü ta nüxŭ nangēxmagüxcèx i maxŭ, rü ngēma Yudíugŭ rü toxna nanachuxu. Rŭ ngēmaäcü i ngēma Yudíugŭ rü poraäcüxüchima chixexŭ naxügŭ. Rŭ ngēmacèx i ñuxma rü düxwa marü nüxna nangu i ngēma Tupanaãrŭ poxcu i äücümaxŭchixŭ.

*Pauru rŭ nüxŭ nangúchaŭ na wenaxãrŭ natanüwa naxŭxŭ ga yema yaxögüxŭ ga Techarónicawa*

*yexmagüxŭ*

17 Pa Chaueneëgüx, yexguma pexna Ítixīxguwena, rü woo tama pexütawa na tayexmagüechaxü, natürü guxüguma pegu tarüxīnūë, rü poraäcü toxü nangüchaü na pexütawa taxīxü na wenaxärü pexü Ítayadaugüxcèx. 18 Rü aixcüma ngema taxīxchaü. Rü chomatama i muëxpüxcüna rü chanaxwèxe na ngema pexütawa taèx chaxüüxüegaxü natürü ngoxo i Chataná rü guxüguma toxü nanaguxchaxëë na tama ngema taxīxcèx. 19 Natürü pexü Ítayadaugüchaüäma erü ngëxguma wenaxärü núma naxüxgu ya tórü Cori ya Ngechuchu ya Cristu rü ¿tècücèx tá nixī i Tupanapëxewa tataãëgüxü i tomax? Rü aixcüma pewa tá nixī i Ítananguxëëxü na tomaã nataãëxü ya Tupana. Rü pema tá nixī i torü taãë pixīgüxü. Rü pegagu tá nixī i aixcüma togümaätama tataãëgüxü i napëxewa. 20 Rü ngëmaäcü pegagu nixī i togümaätama tataãëgüxü, rü pema nixī i torü taãë pixīgüxü.

### 3

1 Rü yema na taxuacüma ñuxäcü wenaxärü petanüwa na chaxüxü, rü düxwa nagu charüxīnü na Atenagutama na charüxäüxü. 2-3 Rü pexütawa chanamu ga taeneë ga Timutéu na pexü Íyadauxüxcèx. Erü núma nixī i Tupanaärü puracütanüxü i wüxigu namaã tapuracüexü na tanaxunagüxcèx i ngëma ore i mexü i Cristuchiga. Rü ngema petanüwa chanamu na pexü nangüxëëxüxcèx na yexeraäcü peyaxögüxüxcèx rü aixcüma petaãëgüxüxcèx rü ngëmaäcü taguma texé i petanüwa nüxü rüxoxüxcèx ega tacü rü guxchaxü pexü ngëxmagu. Erü

pematama marü nüxü pecuèx na guxãma i yixema na yaxõgüxü rü ngúxü tá tingegü. <sup>4</sup> Rü yexguma petanüwa tayexmagügu rü marü pemaã nüxü tixu na ngúxü tá pexü üpetüxü. Rü pema marü nüxü pecuèx na aixcüma yemaãcü pexü nangupetüxü. <sup>5</sup> Rü yemacèx ga yexguma marü tama namaã chaporagu ga yema tama paxa pechigaxü na chacuáxü, rü yemacèx düxwa Timutéuxü yéma petanüwa chamu na pexna yaçaxüçèx ngoxi meã ípeyaxõgüama i Tupanaãrü ore. Yerü chaxoegaãë rü bexmana ngoxo i Chataná rü chixexügu pexü nayixëë, rü chi ngëmaãcü yixígu, rü natüçèxmamare chi nixí ga pemaã nüxü tixuxü ga Tupanaãrü ore. <sup>6</sup> Natürü ñuxma na ínanguxü i Timutéu na petanüwa ne naxüxü, rü mexü i ore i pechiga ngema ne nange. Rü tomaã nüxü nixu na ñuxãcü meã peyaxõgüxü, rü ñuxãcü guxãma meã pegü pengechaügüxü. Rü tomaã nüxü nixu ta na ñuxãcü guxüguma toxü pengechaügüãcüma togu perüxínüëxü, rü ñuxãcü poraãcü wena toxü pedaugüchaüxü rü ngexgumarüxü ta i toma rü toxü nangúchaü na wena pexü tadaugüchaüxü. <sup>7</sup> Rü ngëmacèx, Pa Chaueneëgüx, rü woo guxchaxü toxü na ngëxmaxü rü ngúxü na tingegüxü, rü poraãcü toxü nataãëxëë i ngëma pexü na tacuáchigaxü na meã ípemaxëxü rü meã peyaxõgüamaxü. <sup>8</sup> Rü ñuxma na nüxü tacuáchigaxü na aixcüma meã tórü Coriaxü peyaxõgüamaxü, rü poraãcü tataãëgü. <sup>9</sup> ¿Rü ñuxãcü tá Tupanana moxë taxã naxcèx i ngëma taãë i taxü i toxna pexãxü? Erü aixcüma pegagu nixí i toxü nangëxmaxü i wüxi i taãë i taxü i napëxewa.

10 Rū ngunecü rü chütacü rü tayumüxëgü, rü Tupana naxcèx tacagü na petanüwa toxü nawoeguxëxücèx na wena pexü tadaugüxücèx rü pexü tarüngüxëgüxücèx na yexeraäcü nüxü peyaxögüxücèx. 11 Rü poraäcü tanaxwèxegü na Tanatü ya Tupana rü tórü Cori ya Ngechuchu ya Cristu toxü natauxchaxëxü na wena petanüwa ítayadaugüxücèx. 12 Rü tanaxwèxegü na tórü Cori ya Ngechuchu pexü rüngüxëxü na yexeraäcü pegü pengechaügüxücèx rü guxü i duüxügüxü na pengechaügüxücèx, ngëxgumarüü i toma rü poraäcü pexü na tangechaügüxürüü. 13 Rü tanaxwèxegü na tórü Cori ya Ngechuchu pexü rüngüxëxü na peäewa rü aixcüma meä peyaxögüxücèx rü norü duüxügü i aixcüma mexügü na pixügüxücèx rü na nataxuxücèx i perü pecadugü i napëxewa ya Tanatü ya Tupana i ngëxguma wena núma naxüxgu ya tórü Cori ya Ngechuchu ya Cristu namaä i guxüma i norü duüxügü. Rü tanaxwèxe na ngëmaäcü yïxü.

## 4

### *Maxü i Tupanaxü taäxëxüchiga*

1 Rü ñuxma Pa Chaueneëgüx, rü tórü Cori ya Ngechuchuégagu pexü tacèxü rü pexü tamu na guxüguma Tupanacèx meä pemaxëxü yema pexü tangüxëxürüü rü ñuxma marü penaxüxürüü. 2 Pema rü marü nüxü pecuèx ga yema torü ucuxëgü ga tórü Cori ya Ngechuchu toxü muxü na pexü tangüxëxücèx. 3 Rü Tupana nanaxwèxe na aixcüma namexü i perü maxü rü naxcèxicatama na pemaxëxü. Rü tama name i chixri pemaxë i

napēxewa rü to i ngexūgūmaã pengēãēgūmare.  
<sup>4</sup> Rū wūxichigū tanaxwèxe na aixcūma tūmamèxū tangechaūxū, rü ngīmaãxīcatama na tamaxūxū.  
<sup>5</sup> Rū tama name i ngīxū na pecuáxchaūmarexūcèx ngīmaã pexāmèx i wūxi i nge erü ngēmaãcū namaxē i ngēma duūxūgū i tama Tupanaãxū yaxōgūxū. <sup>6</sup> Rū tama name i texé ngīmaã tamaxū i naxmèx ya tūmaēneē. Erü yexgumarūū ga marü pemaã nüxū tixuxūrūū, rü Tupana tá poraãcū tüxū napoxcu ya guxāma ya yīxema ngēmaãcū maxēxē. <sup>7</sup> Erü Tupana tüxū nade na meã imaxēxūcèx rü tama chixexū ixūgūxūcèx.  
<sup>8</sup> Rū ngēmacèx ega texé tama naga ĩnūgu i ñaã ngūxēētaegū, rü pemaã nüxū chixu rü tama wūxi i duūxūga nixī i ngēma nüxū taxoxū, natürü Tupanagatama nixī i nüxū taxoxū. Rū guma nixī ga pexna namucū ga Naãē i Üünexū. <sup>9</sup> Rū ngēma na pegū pengechaūgūxūchiga, rü taxucèxma pexcèx chanaxūmatū i poperawa. Yerü Tupanatama marü pexū nangúexēē i ngēma na ñuxãcū aixcūma pegū pengechaūgūxū. <sup>10</sup> Rū aixcūma nixī i guxūguma meã nüxū pengechaūgūxū i guxūma i taeneēgū i Machedóniãñewa ngēxmagūxū. Natürü, Pa Toeneēgūx, pexū tacèexūgū na yexeraãcū meã nüxū pengechaūgūxūcèx.  
<sup>11</sup> ¡Rü meã pegū pengechaūgū, rü pexrütama maxūgu perūxīnūē, rü tama i togüarü maxūgu! ¡Rü pematama naxcèx pepuracüe i perü ngēmaxūgū yema marü pemaã nüxū tixuxūrūū!  
<sup>12</sup> Rū ngēxguma ngēmaãcū pemaxēgu, rü ngēma duūxūgū i tama yaxōgūxū rü tá pexū nangechaūgū, rü taxuūtáma pexū nataxu.

*Ñuxãcü tá nixĩ i ngẽxguma nataegugu ya tórü Cori*

<sup>13</sup> Pa Chaueneẽgũx, rü ñuxma rü tá pexũ nüxũ chacuẽxẽẽ i ngexta tá naxĩxũ i ngema yaxõgũxũ i yuexũ na ngemaãcü tama pengechaũgũxũcèx naxrũxũ i ngema tama nüxũ cuèxgũxũ na wena tá namaxẽxũ i ngema yuexũ. <sup>14</sup> Erü yixema na yaxõgũxũ na nayuxũ rü wena namaxũxũ ga Ngechuchu, rü ngẽxgumarũũ ta tayaxõgũ na Tupana tá ínadağũxẽẽxũ i guxũma i ngẽma Ngechuchuaxũ yaxõgũãcüma yuexũ. <sup>15</sup> Rü ngẽmacèx pemaã nüxũ tixu i ngẽma ore ga tórü Cori ya Ngechuchu namaã nguxẽẽtaexũ. Rü ngẽxguma wena núma naxũxgu ya tórü Cori ya Ngechuchu rü yixema na imaxẽxũ i ñoma i naãnewa rü tãütáma yixira napẽxe taxĩ i ngẽma yuexũ. <sup>16</sup> Erü nümatama ya Cori ya Ngechuchu rü daxũwa tá ínaruĩ, rü tá nangẽxma i wüxi i naga i taxũ i daxũwa inaxũxũ i tüxũ muxũ, rü tá nüxũ taxĩnüẽ i Tupanaãrũ orearũ ngeruũgũarũ ãẽxgacũ i tagaãcü daxũwa icagũxũ, rü tá yacuegũxũ ya Tupanaãrũ corneta. Rü ngẽxguma i ngẽma yuexũ i Cristuaxũ yaxõgũxũ rü tá ínaruđagũ. <sup>17</sup> Rü ngẽmawena i yixema na imaxẽxũ rü Tupana tá wüxigu caixanexũgu tüxũ nigagũ namaã i ngẽma duũxũgũ i yuwa írũdagũxũ. Rü ngẽmaãcü tá daxũgu tórü Cori ya Ngechuchuxũ tayangaugũ na guxũgutáma naxũtawa ingẽxmagũxũcèx. <sup>18</sup> Rü ngẽmacèx chanaxwèxe i ñaã oremaã pegũ petaãẽxẽẽgũ.

**5**

<sup>1</sup> Natürũ, Pa Chaueneẽgũx, rü ngẽma norũ ngunexũ rü tauncü i tá nagu nangupetũxũ i ngẽma pemaã nüxũ chixuxũ, rü taxucèxma pexcèx

chanaxümatü i ngēmachiga. <sup>2</sup> Erü pematama meã nüxŭ pecuèx rü ngēma ngunexŭ i taxúema nagu ínanguxēēxŭgu tá nixĩ i ínanguxŭ ya tórü Cori ya Ngechuchu. Rü ñoma wüxi i ngítexáxŭ i ngürüächi chütacü ínguxŭrüŭ tá nixĩ. <sup>3</sup> Rü ngēxguma duŭxŭgü nagu íruxĩnŭēgu na guxŭma na mexŭ rü taxuŭma na nüxŭ üpetüxŭ, rü ngēma ngunexŭgügu rü tá ngürüächi nagux i guxŭma. Rü ñoma wüxi i ngecü i āxácücü rü ngürüächi ngíxácümaã nguxnecacürüŭ tá nixĩ na taxúema naxchaxwa iñaxŭ i ngēma. <sup>4</sup> Natürü pemax, Pa Chaueneēgŭx, rü marü meãma nüxŭ pecuèx i Cristuarü nguchiga. Rü ngēmacèx taxucèxma ngürüächi pexŭ ínayabaixgü ya Cori ya Ngechuchu ñoma wüxi i ngítexáxŭ tüxŭ íbaixgŭxŭrüŭ. <sup>5</sup> Erü guxãma i pema rü Tupanaärü duŭxŭgü pixīgü, rü ngēmacèx ngóonexŭwa pengēxmagü rü meãma nüxŭ pecuèx na ñuxácü meã pemaxēxŭ. Rü yixema rü tama Chatanáärü duŭxŭgü tixīgü, rü ngēmacèx tama ēānexŭwa tangēxmagü rü tama tanaxü i ngēma chixexŭ i ēānexŭwa üxŭ. <sup>6</sup> Rü ngēmacèx tama name i taechita tamaxēmare naxrüŭ i ngēma duŭxŭgü i tama yaxōgŭxŭ. Rü name nixĩ i taxuãēgü, rü meã taāēgu tarüxĩnŭē. <sup>7</sup> Erü ngēma duŭxŭgü i naēchitamare maxēxŭ rü ñoma duŭxŭgü i chütacü peexŭrüŭ nixīgü. Rü ngēma duŭxŭgü i axegŭxŭ rü chütacü nixĩ i nŭgü nangāxēēxŭ. <sup>8</sup> Natürü i yixema rü ngóonexŭwa tangēxmagü, rü ngēmacèx tanaxwèxe i guxŭguma taxuãēgü. Rü name nixĩ i aixcüma meã Tupanaāxŭ tayaxōgü, rü yigü tangechaŭgü, rü meã ítananguxēē na Tupana tüxna naxāxŭcèx i ngēma maxŭ i taguma gúxŭ.

Rü ngēxguma ngēmaãcü imaxēgu, rü ngēmaãcü tá yigü itapoxŭ i ngēxguma Chataná chixexŭgu tüxŭ yixēēchaŭgu. <sup>9</sup> Erü Tupana rü tama tüxŭ nade na tüxŭ napoxcuexŭcèx, natürü tüxŭ nade na tórü Cori ya Ngechuchu ya Cristugagu nayauxgŭxŭcèx i maxŭ i taguma gúxŭ. <sup>10</sup> Rü Ngechuchu ya Cristu rü taxcèx nayu na wüxigu namaã imaxēxŭcèx i daxŭguxŭ i naãnewa. Rü nüetama ega woo marü iyuyane ínanguxgu rü éxna imaxēyane ínanguxgu, erü daxŭguxŭ i naãnewa rü wüxiwa tá namaã tamaxē. <sup>11</sup> Rü ngēmacèx, Pa Chaueneēgŭx, rü name nixĩ i wüxichigü pegü petaãēxēēgü rü pegü peporaexēē i perü ōwa ngēxgumarüŭ i ñuxma na marü ípenaxŭgŭxŭ.

*Pauru rü nayaxucŭxēgŭ ga yema yaxōgŭxŭ*

<sup>12</sup> Pa Chaueneēgŭx, pexŭ tacèxŭgŭ na nüxŭ pengechaŭgŭxŭcèx i ngēma taeneēgŭ i petanüwa puracŭexŭ rü pemaã icuèxgŭxŭ rü pexŭ ngúexēēxŭ i Cori ya Ngechuchuarü ore. <sup>13</sup> Rü name nixĩ i namaã petaãēgŭ rü aixcŭma meã nüxŭ pengechaŭgŭ i ngēma taeneēgŭ, erü nümagü nixĩ i pexŭ nangŭxēēgŭxŭ. Rü name nixĩ i pegü pengechaŭgŭãcŭma pemaxē. <sup>14</sup> Rü pemaã nüxŭ tixu ta na penaxucŭxēgŭxŭ i ngēma duŭxŭgŭ i oexŭ i tama pura-cüechaŭxŭ. ¡Rü nüxŭ penangŭchaŭxēēgŭ i ngēma duŭxŭgŭ i marü nüxŭ rüxoechaŭxŭ na yaxōgŭãxŭ! ¡Rü nüxŭ perüngŭxēēgŭ i ngēma duŭxŭgŭ i turaexŭ i norü ōwa! ¡Rü name nixĩ i yaxna namaã pexĩnüē i guxŭma i ngēma taeneēgŭ! <sup>15</sup> Rü ngēxguma texé chixexŭ pemaã ũxgu, rü tama name i chixexŭmaã penataeguxēē. ¡Natürü name nixĩ

i naxcèx pedau na guxŭguma mexŭ pexŭgŭxŭ i pegŭtanŭwa rŭ ngema togŭtanŭwa rŭ ta! <sup>16</sup> Rŭ name nixŭ i guxŭguma petaãĕgŭ. <sup>17</sup> ;Rŭ guxŭguma peyumŭxĕgŭ! <sup>18</sup> ;Rŭ woo ŭacŭ pexŭ ngupetŭgu, rŭ Tupanana moxĕ pexãgŭ! Erŭ ngĕmaãcŭ nanaxwĕxe ya Tupana na pemaxĕxŭ i pema i Ngechuchu ya Cristuarŭ duŭxŭgŭ na pixŭgŭxŭ. <sup>19</sup> Rŭ tama name i nŭxŭ pexoe i Tupanaãĕ i Ŭŭnexŭ. <sup>20</sup> Rŭ tama name i nŭxŭ pexoe i Tupanaãrŭ ore ega texĕwa pemaã yadeaxgu ya Tupana. <sup>21</sup> Natŭrŭ name nixŭ i meãma penangugŭ i guxŭma i oregŭ na nŭxŭ pecuáxŭcĕx rŭ ngoxi aixcŭma yŭxŭ i ngĕma ore rŭ ĕxna tama. ;Rŭ ngĕma ore i aixcŭma mexŭxŭcatama pixŭgŭ! <sup>22</sup> ;Rŭ nŭxna pixŭgachi i nagŭxŭraŭxŭ i chixexŭgŭ! <sup>23</sup> Rŭ chanaxwĕxe i nŭmatama ya Tupana ya tŭxŭ taãĕxĕcŭ pexŭ imexĕĕ na aixcŭma napĕxewa pimexŭcĕx. Rŭ chanaxwĕxe i guxŭwama pexna nadau i peãĕwa rŭ pexenewa na nataxuxŭcĕx i ŭacŭ i perŭ chixexŭ i ngĕxguma wenaxãrŭ nŭma naxŭxgu ya tŭrŭ Cori ya Ngechuchu ya Cristu. <sup>24</sup> Rŭ nŭma ya Tupana ya pexŭ decŭ rŭ nixaixcŭma na yanguxĕĕãxŭ i guxŭma i ngĕma tamaã inaxunetaxŭ.

*Pauru rŭ wenaxãrŭ yema duŭxŭgŭxŭ narŭmoxĕ rŭ naxcèx ínaca na Cori ya Ngechuchu ya Cristu meã nŭxŭ rŭngŭxĕĕxŭ ga*

*yema yaxŭgŭxŭ*

<sup>25</sup> Pa Chaueneĕgŭx, ;Toxcĕx peyumŭxĕgŭ! <sup>26</sup> Rŭ chanaxwĕxe i chauĕgagu nŭxŭ perŭmoxĕgŭ i guxŭma i taeneĕgŭ. <sup>27</sup> Rŭ Cori ya Ngechuchuĕgagu pexŭ chamu na guxŭ i taeneĕgŭpĕxewa na nŭxŭ

pedaumatüxŭ i ñaã popera i pexcèx ngema  
chamuxŭ. <sup>28</sup> Rŭ chanaxwèxe i tórü Cori ya  
Ngechuchu ya Cristu pexŭ narüngŭxêê i guxâma i  
pemax.

Rŭ nuãma pexna,  
Pauru

**Tupanaarü Ore i Tóru Cori ya Ngechuchu ya  
Cristuchiga  
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ticuna

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files dated 29 Jan 2022

9d5dc22a-30be-5d26-85a9-76047f4c89e6